



गृहमंत्री अमित शाह होर कल संज्ञा नमीं दिल्ली च लाल किले दे कोल होए दे कार धमाके मगरा स्थिति दा जायजा लैने लेई अज्ज इक उच्ची सतह दी सुरक्षा समीक्षा बैठक दी अध्यक्षता करा रदे न। इस बैठक च केन्द्री गृह सचिव- खूफिया ब्यूरो दे निदेशक- दिल्ली पुलिस दे आयुक्त ते राष्ट्रीय जांच एजेंसी एन.आई.ए दे महानिदेशक शामिल होआ रदे न। जम्मू-कश्मीर दे पुलिस महानिदेशक बी वर्चुअल तरीके कन्नै इस बैठक च हिस्सा लै रदे न। घटना दे फौरन मगरा सब्भनें संवेदनशील इलाकें च सुरक्षा गी सख्त करी दिता गया ऐ। धमाके दे कारणें ते परिस्थितियें दा पता लाने- सार्वजनिक सुरक्षा यकीनी बनाने ते सामान्य स्थिति बहाल करने लेई जांच जारी ऐ।

<><><><><><>

दिल्ली च हाल च होए दे धमाके दे बाद रियासी जिला प्रशासन ते पुलस नै कटरा- श्री माता वैष्णो देवी दी यात्रा दे आधार शिविर ते आले-दोआले दे इलाकें च सुरक्षा बधाई दिती ऐ। आकाशवाणी जम्मू दे संवाददाता दी रिपोर्ट मुजब शरदालुएं ते मकामी बसनीकें दी सुरक्षा गी यकीनी बनाने लेई इलाकें गी हाई-अलर्ट पर रखेया गेदा ऐ। मुख थाहरें दा मुआयना कीता जा रदा ऐ। कटरा दे सब्भनैं प्रवेश ते निकास थाहरें पर विशेष नाके लाए

गेदे न- जिंदे च गड़्डियें दी जांच ते तस्दीक सरबंधी अभियान होर तेज कीता गेदा ऐ।  
भवन आले रस्ते- रेलवे स्टेशन- बस अड्डे ते होरनें भीड़-भाड़ आले इलाके च बाद्दू  
सुरक्षाबलें गी तैनात कीता गेदा ऐ। सी.सी.टी कैमरे दी निगरानी ते पुलस ते नीम फौजी  
बलें आसेया गश्त बधाड़यें निगरानी गी होर मजबूत कीता गया ऐ।

<><><><><><>

## Polling

जम्मू-कश्मीर दे नगरोटा ते बडगाम असैम्बली हलकें च शांतिपूर्ण तरीके कन्नै मतदान  
जारी ऐ। अज्ज बड्डलै 11 बजे तककर नगरोटा असैम्बली हलकें लेई 34 इशारिया 4-7  
फीसदी ते बडगाम हल्के लेई 21 इशारिया 7-4 फीसद मतदान दर्ज कीता गया। नगरोटा  
च तकरीबन 98 हजार मतदाता 10एं मेदवारें दे भागें दा फैसला करगंन। वोट पाने लेई  
150 मतदान केन्द्र बनाए गेदे न। इस्सै चाली बडगाम च मतदाता 17एं मेदवारें दे  
सियासी भागें दा फैसला करा करदे न। वोट पाने दा कम्मसंज 6 बजे तोड़ी जारी रौहग।  
अधिकारियें लोके गी अपने वोट पाने दे अधिकार दी बरतून करने दी अपील कीती ऐ। वोटें  
दी गिनतरी 14 नवम्बर गी कीती जाग।

<><><><><><>

## Search Ops.

अनंतनाग ते कुलगाम पुलस आस्सेया जिले च कन्नू बवस्था गी बनाई रक्खने- उसी  
मजबूती देने ते राष्ट्र विरोधी गतिविधियें पर काबू पाने लेई तपाशी अभियान चलाए गे।  
अनंतनाग पुलस दी टीम नै सुरक्षा बलें कन्नै लाल चौक अनंतनाग ते Kheribal जिला जेल

कश छापेमारी कीती। एह छापेमारी जम्मू-कश्मीर दे ओह बसनीक जेड़े -पाकिस्तान यां पाकिस्तान दे गैर-कनूनी कब्जे आहले जम्मू-कश्मीर JKNOP कन्नै जुड़े दे न ते जिनें लोकेँ UAPA तैहत पाबंदियां न- उंदे उत्थे कीती गई ऐ। कुलगाम पुलस नै JKNOP ते OGW दे 8 रिश्तेदारें गी हिरासत च लैता ऐ ते उनेंगी Central Jail अनंतनाग भेजी दिता गया ऐ। इस छापेमारी दा मकसद आतंकवाद सरबन्धी नैटवर्क गी खत्म करना ते लोकेँ दी सुरक्षा गी यकीनी बनाना ऐ।

<><><><><><>

## CS Homestays

मुख्य सचिव अटल डुल्लु होरें सैलसफा मैहकमे दी होमस्टे सरबन्धी नीति गी लागू करने दा जायजा लैता ऐ। एदा मकसद समूलचे जम्मू-कश्मीर च सामुदायक आधारत सैलसफा गी बढ़ावा देना ऐ। एदे लेई उनें डिजिटल मौजूदगी बधाने लेई सोशल मीडिया दी बरतून करने पर जोर पाया ऐ। डुल्लु होरें माली सहायता दा आहवान कीता ते जम्मू-कश्मीर बैंक सवां-होमस्टे मालकेँ लेई कर्जे देने सरबन्धी सरिस्ता शुरू करने दी अपील कीती। अधिकारियें रजिस्ट्रेशन कराने दे कम्मै गी सौकखा बनाने- ग्रेडिंग प्रणाली ते QR आधारत अदायगी राएं ग्राहकेँ दे तर्जुबें गी होर खरा बनाने बारे सोच-विचार कीता। मुख्य सचिव होरें पंजीकृत होए दे तकरीबन 1000 हजार होमस्टे दा जिक्र करदे होई आखेया जे नीति गी बेल्लै सिर लागू करने कन्नै केन्द्र शासित प्रदेश च मुकामी समुदाय होर बाईखतेयार होगंन- रोजगार पैदा होगंन ते दूर-दरेडे इलाकेँ च सैलसफा गी बढ़ावा थोहग।



## JMC Air Pollution

जम्मू म्यूनिसिपल कारपोरेशन आसेया शैहर च बददे हवा प्रदूषण गी काबू च करने लेई अपने जत्ने गी तेज करी दिता ऐ। इत्थे AQI दी स्तर 179 पुज्जी गया ऐ। जे.एम.सी. दे कमीशनर डाक्टर देवांश यादव होरें रातीं बेल्ले सिड़कें दी सफाई करने- दिने पानी छिड़कने ते धूएं गी घट्ट करने आस्तै Anti Smog Guns दा इस्तेमाल करने लेई हिदायतां दितियां न। इसदे इलावा निर्माण आहली थाहरें लेई जारी दिशा-निर्देश दी पालमा सरबन्धी माल ाने आहली गड्डियें गी पूरी चाली सील करने लेई बी आखेया गया ऐ। नियमें दी खिलाफवर्जी करने आहलें नै सख्ती नै निबड़ेया जाग ते जुर्माना बी लाया जाग। ठोस कचरा प्रबंधन-खुल्ले च नेंई कचरा फूकने लेई बी आखेया गया ऐ। कमीशनर होरें लोकें गी अपील कीती ऐ जे ओ क्लीन जम्मू- ग्रीन जम्मू जत्न तैहत सहयोग करन ते शैहर दी आबो-हवा गी साफ-स्वच्छ बनाने च सहयोग करन।



## Education Ramban

शिक्षा मैहकमे नै रामबन च हाल च अध्यापकें गी सिखलाई- समावेशी शिक्षा- डिजिटल उपकरणें-व्यवसायिक सिखलाई ते उच्च शिक्षा मुत्तलक केई सारियें कार्यशालाएं दा आयोजन कीता। अधिकारियें जिला शिक्षा ते सिखलाई संस्थानें (डाइट) गी मजबूत करने दे कन्नै- कन्नै विद्यार्थियें दे सिक्खने ते विकास गी आकार देने च चरित्र ते मूल्यें दी भूमिका पर

जोर पाया। इन्नें कार्यशालाएं च विद्यार्थियें लेई चित्रकला- मिट्टी दे पांडे-टोकरी बुनाई- सलाई ते लकड़ी दे कम्में समेत व्यावहारिक कौशल आधारित कम्म बी शामिल हे।

<><><><><><><>